



Jumat, 04 Maret 2022

Ogen: Esekiel 30:1-19



ULIH NEMBEH ATE DIBATA



Megati ibas kegeluhenta sikataken lit sebab akibat. Kai pe silakoken kita lit ulihna desken hukum 'tabur tuai', kai si i amburndu e ka siperani. Kalak si ngambur kiniulin pasti ngaloken kiniulin dingeng si ngambur nembah ate ngaloken kinilingen. Emaka perlu kal kita metenget nandangi perukuren si turah ibas ukurta, pentarlah kita erbahan keputusan ibas kai-kai si lakoken kita sabab kai pe siibahan kita e ndatken ulih ibas geluhta.

Bali ras Nebukadneser ras tenterana sienggo ngaloken ulih arah kai siidahikenna bage ka me Mesir ngaloken ulih arah kai si ibahanna eme pernembah ate Dibata. Ija bangsa sijadi temanna, bangsa sijadi upahenna, kerina mate seh maka negeri e runtuh dingeng jadi kuta simelungun. Ikernepen, iciluk Dibata kuta-kuta e alu make raja Nebukadneser. La saja kuta ras kotana kernep ras terulang tapi kerina anak peranana pe mate kerina ibas perang. Pendudukna ibaba jadi tabanen. Bagenda me Dibata nuriken kai siibahanna nandangi bangsa si meganjang ukur, si ngandalken gegehna jine. Kalak sideban pe banci ipakena guna nuriken kuga belinna kuasaNa nandangi doni enda. Enda me siarus iidah bangsa Israel. Bagenda me cara Dibata tole mpetandaken diriNa man bangsaNa jine.

Bagenda me ulih pernembah ate Dibata. Tapi kelengate Dibata belinen kepe asangken pernembah ateNa e. Emaka lit paksana Dibata ngalemi kelepakken bangsaNa amin rusur kal erbahan ceda ate Dibata. Sabab labo erkiteken perbahanen, kiniulinta kal ngenca maka kita terkelin. La lit singasup pulah ibas pernembah ate Dibata emaka Dibata jine arah AnakNa Jesus Kristus reh kudoni enda gelah siarusna ngaloken pernembah ate e banci ngaloken perkuah ateNa si lanai kal langlang belinna, eme keterkelinen sijadi ulih kinitekenta.

☞ *Daramilah ulih keleng ate Dibata*